

इवनिंग डोगरी न्यूज़ बुलेटिन

समे .18:20 Hrs

Headlines

- लेफ्टिनेंट गवर्नर मनोज सिन्हा होरें आखेआ जे पाकिस्तान च ऐसी कोई थाहर नेई ऐ जेड़ी भारती फौज दी पुज्ज थमां बाहर होऐ।
- मुख्मन्त्री उमर अब्दुल्ला होरें आखेआ ऐ जे उंदी सरकार दा पूरा-पूरा ध्यान अमरनाथ जात्तरा दे कामयाब आयोजन पर ऐ तां जे सैलसफा च परतियै नमें सिरेआ जान भरी जाई सकै।
- राज्य जांच एजेंसी ए.आई.ए. नै मध्य ते उत्तरी कश्मीर च कई सारी थाहरें पर छापे मारे न।
- सशस्त्र बलें दी दलेरी दे सम्मान च जम्मू खित्ते दे केई सारे हिस्सें च तिरंगा यात्राएं दा आयोजन कीता गेआ।
- तकरीबन 1 हफ्ते तोड़ी मुअत्तल रौहने परेंत आई.पी.एल 2025 अज्जा थमां फी शुरू होआ'रदा ऐ ते पैहला मुकाबला अज्ज बेंगलुरु च रॉयल चैलेंजर्स बेंगलुरु ते कोलकाता नाइट राइडर्स बश्कार होग।

<><><><><><>

LG-Tangdhar

भारत गी नशाना बनाने आहले आतंकी समूहें गी समर्थन देआ'रदे पाकिस्तान गी कड़ी चेतावनी दिंदे होई उपराज्यपाल मनोज सिन्हा होरें अज्ज आखेआ जे गोआंडी मुल्खै च ऐसी कोई चीज नेई ऐ जेड़ी भारती सशस्त्र बलें दी पुज्ज थमां बाहर होऐ। तंगधर च नियंत्रण रेखा कश तैनात फौजियें कन्नै गल्ल करदे होई एल.जी होरें आखेआ जे सारी दुनिया नै भारतीय फौज दी दी दलेरी दिक्खी ऐ ते एहू बी दिक्खेआ ऐ जे कियां पाकिस्तान नै पूरी दुनिया अगगे गुहार लाना शुरू कीता। सिन्हा होरें आखेआ जे अस्स कदें बी युद्ध दे पक्खै च नेई रेह ते शांति ते रमानदारी कन्नै रौहना चाहने आं। उनें पाकिस्तान पर इल्जाम लाया जे ओहू कर्जे दी बिनाह इन्सानियत गी तबाह करने पर तुले दा ऐ। इस मौके पर बोलदे होई एल.जी होरें आखेआ।

<><><><><><>

CM

मुख्यमंत्री उमर अब्दुल्ला होरें अज्ज आखेआ जे इस्सलै सरकार दा पूरा-पूरा ध्यान अमरनाथ जी दी जात्तरा दे सफल आयोजन पर ऐ कीजे हालिया घटना दे कारण जम्मू-कश्मीर च सैलसफा पर बड़ा माड़ा असर पेआ ऐ। उनें आखेआ जे सरकार दी प्राथमिकता ऐ जे खित्ते च सैलसफा गी परतियै बहाल कीता जाई सकै। एहदे अलावा मुख्यमंत्री होरें इस गल्लै पर बी जोर पाया जे पाकिस्तान आसेआ कीती गेदी गोलाबारी च होए दे नुकसान दा सरकार इस्सलै आंकलन करा'रदी ऐ ते तौले गै रिपोर्ट तैयार होने दे बाद प्रभावित लोकें गी मुआवजा दित्ता जाग। उनें आखेआ जे बन्ने आहले इलाकें च नियंत्रण रेखा कश संघर्ष विराम दी उल्लंघना दी कोई खबर नेई ऐ। तोआई, सीमा पार आतंकवाद खलाफ भारत दी लड़ाई गी लगातार अगगे बधाने ते आप्रेशन सिंदूर लेई मुख-मुख भ्याल मुखें दा दौरा लाने आहले सर्वदलीय प्रतिनिधिमंडल बारै बोलदे होई आखेआ।

<><><><><><>

SIA-Raids

राज्य जांच एजेंसी एस.आई.ए नै अज्ज मध्य ते उत्तर कश्मीर दी कई सारी थाहरें पर अज्ज छापे मारे न। एह छापेमारी आतंकवाद सरबंधत संदिग्ध गतिविधियें पर तफसीली कार्रवाई दा इक हिस्सा ऐ। अज्ज बडुलै रम्भ होई दी छापेमारी उत्तरी कश्मीर दे सोपोर, बारामूला ते हंदवाड़ा च कीती जा'रदी ऐ। जिस्सलै के मध्य कश्मीर दे गांदरबल ते श्रीनगर च शुरू कीतियां गेइयां। इनें छापेमारी दौरान अजें तगर कोई बी गिरफ्तारी ते बरामदगी दी खबर नेई ऐ। सूत्रें दस्सेआ जे एह तपाशी कश्मीर च चलाए जा करदे आतंकवादी तंत्र दा खात्मा करने कन्नै जुड़े दा ऐ। ध्यानजोग ऐ जे एह कारवाइयां बड़गाम जिले दे कावूसा नारबल इलाके च प्रतिबंधित आतंकी गुट लश्कर-ए-तायबा दे 3 साथियें गी गिरफ्तार करने मगरा कीतियां गेइयां न।

<><><><><><>

Satish-Infra Projects

ट्रांसपोर्ट मंत्री सतीश शर्मा होरें छम्ब हल्के दा व्यापक दौरा लाइयै कई महत्वपूर्ण ढांचागत परियोजनाएं दा नींह पत्थर रक्खेआ ते कई सार्वजनिक सुविधाएं दा उद्घाटन बी कीता। अपने दौरे दौरान मंत्री होरें मैरा मांदरेयां आहले प्राथमिक सेहत केंद्र परिसर च 45 लक्ख रपे दी अंदाजन लागत कन्नै तैयार कीते जाने आहले ब्लॉक सार्वजनिक सेहत इकाई लेई नींह पत्थर रक्खेआ। मंत्री होरें कंडी पंचैत दे गोधान ग्रांऽ च 9 लक्ख 76 ज्हार रपे दे खर्च कन्नै बनाए गेदे सामुदायिक हाल दा उद्घाटन कीता। एहदे अलावा उनें जिला कैपेक्स बजट तैहत अंदाजन कोई 22 लक्ख 94 ज्हार रपे दे खर्च कन्नै तैयार कीते गेदे जी.एम.एस पयान दा बी उद्घाटन कीता।

<><><><><><>

Tiranga-Yatra

आप्रेशन सिंदूर दी कामयाबी दा जश्र मनाने ते स्हाढे दलेर थेआरबंल बलें लेई सम्मान प्रगट करने दे मकसद कन्नै अखनूर च अज्ज इक्क तिरंगा रैली दा आयोजन कीता गेआ। अखनूर ते खौड़ दमें इलाके थमां बड़ी बद्द गिनतरी च लोकें पूरे जोश कन्नै एहदे च हिस्सा लैता। लोकें हत्थें च तिरंगे झंडे फगड़ियै स्हाढे दलेर जवानें दी सराहना च देशभक्ति दे नारे लाए। किश मकामी लोकें आखेआ।

इस्सै चाल्ली पहाड़ी जिले किशतवाड़ च बी अज्ज द'ऊं तिरंगा यात्राएं दा आयोजन कीता गेआ। एहदे च इक्क तिरंगा यात्रा दी अगुवाई बीजेपी विधायक शगुन परिहार होरें कीती। इस मौके पर बोलदे होई शगुन परिहार होरें आखेआ।

किशतवाड़ जिले च दुई तिरंगा यात्रा दा आयोजन सरकारी डिग्री कॉलेज ते एन.सी.सी यूनिट आसेआ जिला प्रशासन दे सहयोग कन्नै कीता गेआ। तोआई, डोडा जिले च बी मकामी लोकें थेआरबंद बलें कन्नै इक्कजुटता दर्शाने आस्तै तिरंगा रैली कडु। आप्रेशन सिंदूर दी कामयाबी बारै अपने विचार सांझे करदे होई किश मकामी लोकें आखेआ।

<><><><><><>

Heat-Wave

जम्मू दे डिप्टी कमिशनर सचिन कुमार वैश्य होरें लोकें गी आग्रह कीता ऐ जे ओहू बड़ी मती गर्मी आले इस मौसम दौरान अपनी सेहत दा ध्यान रक्खन ते शिक्ल दपैहरी वेबजह बाहर नेई जान। एहदे अलावा उनें एहू बी गुजारिश कीती जे इस मौसम दौरान पानी पीदे रौहन ते बच्चें ते बुजुर्गें दा खास ध्यान रक्खन। उनें आखेआ।

<><><><><><>

IPL-Restart

इंडियन प्रीमियर लीग IPL 2025 इक्क हफ्ते दे वक्फे दे परेंत अज्ज परतियै शुरू होने आहला ऐ जेदे च मेजबान रॉयल चैलेंजर्स बेंगलुरु ते कोलकाता नाइट राइडर्स बश्कार एम. चिन्नास्वामी स्टेडियम बेंगलुरु च इक मैच होग। मैच संझा साढ़े 7 बजे शुरू होग। एहदे शा पैहले भारत ते पाकिस्तान बश्कार बधदे तनाऽ दे कारण आई.पी.एल गी 9 मई गी रोक़ी दित्ता गेआ ह। बी.सी.सी.आई नै टूर्नामेंट दे बचे दे बाकी हिस्से आस्तै इक्क नमां कार्यक्रम जारी कीता ऐ जेदे मताबक मोहाली ते धर्मशाला च कोई मैच नेई होग।

<><><><><><>

Doha-Diamond League

भारत दे नीरज चोपड़ा दोहा डायमंड लीग च मर्दे दे नेजा सुट्टने दे मुकाबले च दुई थाहै पर रेहू न। उनें 90 इशारिया 2-3 मीटर दी रिकॉर्ड दूरी तगर भाला सुट्टने च कामयाबी हासल कीती। जर्मनी दे जूलियन वेबर 91 इशारिया सिफर-6 मीटर दे कन्नै पैहली थाहै पर रेहू। नीरज होरें त्रीये राउंड च 90 इशारिया 2-3 मीटर तगर भाला सुट्टियै अपने करियर च पैहली बारी 90 मीटर दी दूरी गी पार कीता। जूलियन वेबर नै अखीरी कोशश च पैहली थाह हासल कीती। प्रधानमंत्री नरेंद्र मोदी होरें ओलंपिक्स विजेता नीरज चोपड़ा होरेंगी दोहरा डायमंड लीग 2025 च 90 मीटर दा छिंडा पार करने पर मुबारकबाद दित्ती ऐ। सोशल मीडिया पोस्ट च मोदी होरें इस उपलब्धि दी सराहना करदे होई आखेआ जे खडारी दा अपना सब्बनें शा बेहतरीन प्रदर्शन ओहदे अटूट समर्पण ते अनुशासन दा गै नतीजा ऐ। उनें आखेआ जे भारत गी इस कामयाबी पर गर्व ते खुशी ऐ।

<><><><><><>

World Hypertention Day

अज्ज वर्ल्ड हायपरटेंशन डे यानि हाई ब्लड प्रेशर सरबन्धी कुल संसारी ध्याडा ऐ। इस सरबन्धै च अज्ज दुनिया भरै च केई सारे कार्जक्रमें दा आयोजन कीता जा'रदा ऐ। इस ध्याडे दा मकसद हाई ब्लड प्रेशर दे कन्नै जुड़ी दिऐं समस्याएं बारै जागरूकता फैलाना ऐ ते एहदे कन्नै गै एहदे थवां बचाऽ ते एहदे प्रबन्धन बारै बी लोकें गी जानकार बनाना ऐ। इस ब'रे इस ध्याडे दा विषेसार ऐ-“अपने ब्लड प्रेशर दी सेई ढंग्गै कन्नै जांच करो, उसी स्टेई रक्खो ते लम्मी जिंदगी जियो”। इस ध्याडे गी मनाने दी शुरूआत ब'रे 2005 च कीती गई ही। वर्ल्ड हायपरटेंशन लीग नाऽ दी इक्क गैर सरकारी संस्था पूरी दुनिया च इस समस्या गी खत्म करने लेई कम्म करा'रदी ऐ।

<><><><><><>